

**Uunga siunnersuut: Efterskolit aamma paarlaasseqatigiittarnermut tapiissutit pillugit
Inatsisartut inatsisaata allanngortinnissaa pillugu Inatsisartut inatsisaat**
(Ilinniartitaanermut, Kultureqarnermut, Timersornermut Ilageeqarnermullu
Naalakkersuisoq)

Siullermeerneqarneranut oqaaseqaat:

Siunnersuutip siunertaa imminermini ajunngikkaluarpoq,
kisianni Sananeqarnermini allanneqarnerminilu oqaatsinik ajuissortoqarnera
eqqunngitsoqarneralu akuerisinnaanngilarput.

Efterskole-ni, ilinniartinnilu assigisaani, ilinniariarsinnaanissat ammaanneqarnerunissaannut
periarfissaq siunertamisut atuutsinniarneqaraluartoq iluatinnartutut Naleqqamit isigaarput.
Kisianni aamma ilaatigut periarfissanik killiliisunik akkerliittunillu imaqartoq malugaarput.

Naalakkersuisup saqqummiussisutaani kalaallisut oqaaseq "Nunat Avannarliit", tassa
"Norden" pineqarpunngooq. Kisiannili dansk-isut allaqqasuani oqaaseq "Vestnorden"
atorneqalerpoq, tassa "Nunat Avannarliit Killiit".

Tassani Sorleq eqqortuunersoq paaserusunnarpoq.
Ajortoqarpoq. Akuerineqarsinnaanngilaq.

Taamatuttaaq Inatsisissatut siunnersuutip nassuiaataani taaguuteqartileriasaarneqarpoq
oqaaseq atorneqarluni "oqaaseqaatit". Uanga aatsaavissuaq maani qaqeqqavunga.
Taamaakkaluartoq kukkuneq ingerlaannaq takusinnaasimavara.

Nassuiaatit tassa dansk-isut bemærkninger. Oqaaseqaataannngillat.
Taamatulli siunnersuummi allassinneqarput. Eqqunngilaq. Akuerineqarsinnaanilu.

Kalaallit Nunaanni pisortatigoortumik oqaasituaapput kalaallisut oqaatsivut. Taakkualu
aallaavigneqartussaapput.

Taava, siunnersuutip siunertaanut assersuuteqassagaanni,

uani ilaatigut siunertaa eqqarsaatigalugu, aningaasaqarneq qiviaraanni Qallunaat nunaanni efterskolernermi akigitinneqartoq 124.000 kr.-miittoq oqaatigineqarpoq, kisiannili Savalimmiuni ukiumut akiliut 45.000 kr.-iulluni aamma tassuuna aningaasanik atorluaasoqarsinnaagaluarnera iluatinnarpoq.

Kisianni Inatsisip tamakkiisumik aaqqiiffigineqannginnera ilaatigut naalakkersuisut oqaaseqarnerminni nunani avannarlerni, Vestnorden, eqaannerusumik suleqatigiinnissamut aqqissugaanermut alloriarneq siulliussasoq oqaatigineqarluni, siunnersuummili taamaallaat Savalimmiut ilanngunneqarnerat apeqqusernarpoq, Oqaaseq efterskole, soorlugooq Islandimi atorneqanngimmat, uani Island periarfissatut ilanngunneqanngilaq. Tamanna ippinnartutut naleqqamiit isigaarput.

Kisianni aamma siunnersuutip siullermeernissaanut Naalakkersuisut saqqummiussinerminni siunertarinerarpaat, oqaaserpiaq "efterskole" atorneqanngikkaluartoq, Danmark-imi "efterskole"-nut assingusunut allanut tapiisinaanissaaq periarfissikkusullugu.

Nunat allat eqqaanagit, taamaallaat malugalugu Danmark. Tassagooq siunertaa. "Efterskole"-nut assassorlunilu ilinniartinnut assigisaanullu tapiisarnerit siammarnissaannut atuutsinniarneqartutut siunertaqarniaraluarpoq.

Ilinniartitaanermut, Kultureqarnermut, Timersornermut Ilageeqarnermullu Naalakkersuisoq saqqummiussinermini ilaatigut imatut allappoq:

Issuaaneq aallartippoq:

"Fagskolit namminersortut tassaapput efterskolituulli nerisaqarfiutigaluni atuarfiusut, taamaattorli suliassatigut imaluunniit assaat atorlugit suliaqarfiunerusarnertik immikkoorutigaat taamaalillutillu atuartunut atuagarsornikkut piginnaasaqarpallaanngitsunut taakkunaniinnissaaq periarfissaasinnaassalluni"

issuaaneq naavoq.

Sooruna Nunat allat, soorlu Vestnorden-imiittut nunat, ilaatigut Island, taamatuttaaq nunat akilinermiittunut sanilerisatsinnut taaguutinut "efterskole-nut" assigisaanullu aamma periarfissiisoqassanngitsaq?

Danmark-imi "efterskole"-tut taaguuteqanngitsut akuerisinnaagaanni, taava nunani allani, minnerpaamik Islandimi Akilinermilu,



aamma nunani allaasinnaasuni, "efterskole"-tut periarfissiisartut tapiiffigineqarsinnaasariaqartut Naleqqamiit piumasarivarput.

Tamakku ilanngunneqarnissaanut qulakkeerinnikkusuppugut, siammassinnerusumik nunat allat aamma atuarfigineqariartorsinnaaneritut periarfissamik ammaasserusuppugut.

Danmark Kunngaqarfillu kisiisa pinnagit,

Avammut qiviarsinnaassuseqalerniarta periarfissaq ilinniarfissat piumassusilinnut tamaasa ammatikkumallugit.

Taamatut Naleraq tunuliaqutaralugu oqaaseqaateqarlunga, Naalakkersuisut kaammattorusuppugut, siunnersuut iluamik suliarisinnaanissaannik periarfissikkusullugit siunnersuutertsik utertissagaat.

Kaammattuutigaarput siunnersuut kingusinnerusukkut eqqortumik malittarisassallu malillugit suliarisimatillugu aatsaat pisortatigoortumik siunnersuutitut qaqinneqarnissaa.

Siunnersuutip suussusai eqqunngitsumik suliarisimagaanni, soorlu inatsisip "nassuiaatai" siunnersuummi taasaraanni inatsisip "oqaaseqaatai", taava aamma allat ajuiissortumik suliarisimaneraat inatsisilerituutik atorlugit paasiniartariaqarpaat. Pisortatigoortumik oqaatsivut aallaavigalugit maani inersuarmi ingerlatsisussaavugut.

Siunnersuut taamatut isikkoqartillugu akuerisinnaanngilarput. Inatsisissatut siunnersuusiornissamut Inatsisartuni malittarisassat eqqortumik malissimatinnagit suliaq akuerisinnaannginnatsigu.

Maannakkullu siunnersuut itigartissagalarutsigu, siunnersuut una qinersiffik uani atuuttumi qaqeqqinneqarsinnaanaviannngilaq.

Taamaammat siunertaa iluatinnartuusinnaasoq takusinnaallugu taamatut kaammattuilluta periarfisseerusuppugut.

Taamatulli isikkoqartillugu ingerlateqqinneqassappat, Naleqqamit itigartinnissaanut innersuussutigisariaqarparput.